

Na osnovu člana 11. stav (1) Odluke o uslovima, kriterijima i postupku dodjele stipendija nadarenim redovnim studentima javne visokoškolske ustanove (broj: 10/1-11-027295/24 od 03.10.2024. godine), Ministarstvo obrazovanja i nauke Tuzlanskog kantona, raspisuje

K O N K U R S

za dodjelu stipendija nadarenim redovnim studentima javne visokoškolske ustanove koja djelatnost visokog obrazovanja obavlja na području Tuzlanskog kantona, prvog i integrisanog prvog i drugog ciklusa studija, u akademskoj 2024/2025. godini

I

Raspisuje se Konkurs za dodjelu stipendija nadarenim redovnim studentima javne visokoškolske ustanove koja djelatnost visokog obrazovanja obavlja na području Tuzlanskog kantona (u daljem tekstu: Univerzitet), prvog i integrisanog prvog i drugog ciklusa studija, u akademskoj 2024/2025. godini.

II

Ukupna visina stipendije za akademsku 2024/2025. godinu iznosi 1.500,00 KM (hiljaduipetstotina konvertibilnih maraka), a način isplate stipendije će se regulisati odredbama ugovora iz tačke VI ovog konkursa.

Pravo na stipendiju po ovoj odluci može se odobriti za ukupno 180 kandidata i to:

- a) 165 stipendija posebno nadarenim redovnim studenatima Univerziteta;
- b) 15 stipendija posebno nadarenim redovnim studenatima Univerziteta, koji se nalaze u statusu povratnika.

III

Pravo na dodjelu stipendije iz tačke II ima kandidat pod uslovom:

- a) da je državljanin Bosne i Hercegovine,
- b) da ima prebivalište na području Tuzlanskog kantona ili da se nalazi u statusu povratnika, odnosno čiji se roditelj nalazi u statusu povratnika,
- c) da je u statusu redovnog studenta prvog ili integrisanog prvog i drugog ciklusa studija Univerziteta,
- d) da je u tekućoj akademskoj godini prvi puta upisao odnosnu godinu studija,
- e) da je u prethodnoj godini studija ostvario prosjek ocjena minimalno 9,00 i
- f) da je položio sve ispite iz prethodnih godina studija.

Izuzetno od uslova utvrđenog tačkom e) i f), kandidat za dodjelu stipendije u statusu studenta prve godine studija, pravo na dodjelu stipendije može ostvariti pod uslovom da je u prethodne četiri godine redovnog školovanja imao prosjek ocjena 5,00 i da je redovno školovanje završio u školskoj 2023/2024. godini.

IV

Kriteriji za dodjelu stipendija su:

- a) visina prosjeka ocjena ostvarena u prethodnoj godini studija, odnosno prethodne četiri godine redovnog školovanja, u odnosu na tekuću akademsku godinu,
- b) upisana godina studija,
- c) visina prosjeka ocjena ostvarena u svim godinama studija koje prethode godini studija upisanoj u akademskoj godini u kojoj se stipendija dodjeljuje,
- d) rezultati ostvareni na takmičenjima u prethodnoj školskoj godini za kandidate prve godine studija,
- e) kandidat koji je redovan student studijskog programa koji spada u deficitarna zanimanja.

Kriterij iz tačke c) primjenjuje se samo u slučaju ukoliko na rang listi dva ili više kandidata imaju isti broj bodova, u kom slučaju se prednost daje kandidatu koji je ostvario veći ukupan prosjek ocjena u svim godinama studija koje prethode godini studija upisanoj u akademskoj godini u kojoj se stipendija dodjeljuje.

Ukoliko se prednost na rang listi ne može utvrditi po osnovu naprijed navedenih kriterija prednost se daje kandidatu čije domaćinstvo, po članu porodičnog domaćinstva, ostvaruje manji procenat prosječne neto plaće ostvarene u Federaciji Bosne i Hercegovine u prethodnoj godini prema podacima Zavoda za statistiku Federacije Bosne i Hercegovine, u kom slučaju će se od kandidata naknadno tražiti potrebna dokumentacija.

Pod kriterijem iz tačke d) podrazumijevaju se samo rezultati ostvareni na takmičenjima iz nastavnih predmeta koji se izučavaju ili pripadaju naučnoj oblasti na studijskom programu, na koji je kandidat upisan kao redovni student, a koja su organizovana u skladu sa Pravilnikom o organizaciji takmičenja učenika

V

Prijava na Konkurs vrši se putem prijavnog obrasca, koji se može preuzeti na internet stranici Ministarstva obrazovanja i nauke Tuzlanskog kantona (u daljem tekstu: Ministarstvo) i u službenim prostorijama Ministarstva.

Uz prijavu na konkurs kandidat dostavlja sljedeću dokumentaciju (u originalu ili ovjerenjima):

- a) uvjerenje o državljanstvu,
- b) dokaz o prebivalištu,
- c) dokaz da kandidat ima status povratnika u lokalnoj zajednici u kojoj ima prebivalište,
- d) uvjerenje da je na Univerzitetu, u tekućoj akademskoj godini, prvi puta upisao studijsku godinu i da se nalazi u statusu redovnog studenta (samo za studente prve godine studija),
- e) Uvjerenje da je na Univerzitetu, u tekućoj akademskoj godini, prvi puta upisao studijsku godinu i da se nalazi u statusu redovnog studenta sa podatkom o položenim svim ispitima i ostvarenom prosjeku ocjena u prethodnoj godini studija u odnosu na tekuću godinu studija i ukupan prosjek ocjena u svim prethodnim godinama studija, izdato od strane Univerziteta na posebnom obrascu koji je sastavni dio odluke (prilog II),
- f) svjedočanstva o završene prethode četiri godine redovnog školovanja (za studente prve godine studija),
- g) dokaz o ostvarenim nagradama na takmičenjima (za studente prve godine studija),
- h) drugu dokumentaciju određenu tekstom konkursa.

Dokaz o činjenicama pod tačkom e), izuzev kandidata u statusu studenta prve godine studija, kandidat je dužan dostaviti na posebnom obrascu koji se nalazi u prilogu ovog konkursa, a koji će zajedno sa tekstom konkursa biti dostavljen Univerzitetu na postupanje.

Prijave koje nisu sačinjene na propisanom prijavnim obrascu, kao i uvjerenje o činjenicama iz tačke e) koje nije dostavljeno na posebnom obrascu, naprijed navedenom, neće se uzimati u razmatranje.

Sva dokumentacija koja se dostavlja uz prijavni obrazac mora biti dostavljena u originalu ili ovjerenjima fotokopiji, te na jednom od jezika u službenoj upotrebi u Bosni i Hercegovini (uz dokument izdat na stranom jeziku potrebno je dostaviti i originalni prijevod sudskog tumača ili ovjerenu kopiju prijevoda).

VI

Na osnovu konačnih rang listi (konačne rang liste kandidata za dodjelu stipendija za nadarene redovne studente Univerziteta i konačne rang liste kandidata za dodjelu stipendija za nadarene redovne studnete Univerziteta koji se nalaze u statusu povratnika) sa kandidatom se zaključuje ugovor o stipendiranju, kojim se bliže uređuju međusobna prava i obaveze, najkasnije u roku od sedam dana od dana isticanja konačnih rang listi dobitnika stipendije na internet stranici Ministarstva.

Kandidat koji u ostavljenom roku ne potpiše ugovor smatrat će se da je odustao od stipendije, izuzev ako kandidat iz opravdanih razloga nije u mogućnosti potpisati ugovor u ostavljenom roku, o čemu je obavezan dostaviti dokaz na osnovu koga će mu se utvrditi novi termin za potpisivanje ugovora.

Stipendije su nepovratne pod uslovom da kandidat kao potpisnik ugovora redovno ispunjava svoje ugovorene obaveze.

VII

Korisnik gubi pravo na isplatu stipendije, a isplaćenu stipendiju dužan je vratiti u cjelosti ili odgovarajućem iznosu, u zavisnosti od okolnosti koje su dovele do gubitka stipendije, što će se posebno regulisati odredbama ugovora, ukoliko nastupe sljedeće okolnosti:

- a) ako mu bude izrečena disciplinska mjera isključenja sa Univerziteta,
- b) ako mu po nekom osnovu prestane status redovnog studenta na Univerzitetu,
- c) ako se naknadno utvrdi da je prilikom prijave na konkurs iznio lažne činjenice ili upotrijebio lažne dokaze.

Korisnik stipendije dužan je prijaviti svaku promjenu koja je od uticaja na korištenje dodijeljene stipendije, u roku od 15 dana od dana nastupanja iste.

VIII

Konkurs ostaje otvoren 15 dana od dana objavljivanja na internet stranici Ministarstva, odnosno od 04.10.2024. godine zaključno sa 19.10.2024. godine.

Prijave na Konkurs sa potrebnom dokumentacijom šalju se putem pošte preporučeno ili lično na adresu

Centralne pisarnice kantonalnih organa uprave - ulica Fra Grge Martića 8, 75000 Tuzla, sa naznakom „Prijava na Konkurs za dodjelu stipendija nadarenim redovnim studentima javne visokoškolske ustanove koja djelatnost visokog obrazovanja obavlja na području Tuzlanskog kantona, prvog i integrisanog prvog i drugog ciklusa studija, u akademskoj 2024/2025. godini.

Nepotpune i neblagovremene prijave neće se uzeti u razmatranje.

**Ministarstvo obrazovanja i nauke
Tuzlanskog kantona**